



Senin, 21 November 2022

Ogen: Masmur 139:13-15



Bertin Nande



Kai bedana dilaki ras diberu? Penungkunen enda secara hakekat banci ijabab maka si membedakenca dilaki ras diberu emekap diberu lit bertinna. Uga pe usaha dilaki si ersura-sura jadi diberu, rupa banci ioperasina, alat kelamin pe banci iubahken, tapi sada hal emekap bertin nande, labo banci suanken man sekalak dilaki.

Kai dage bertin e. I bas cakap Arab maka bertin e iterjemahken *rechem*. Kata enda serumpun ras kata *racham* si ertina perkuah ate, kasih karunia. Dibata kap ngenca si mada perkuah ate. Implikasi arah dua kata e emekap, sipemena: Dilaki ras diberu hadir bas doni enda selaku buah perkuah ate Dibata. Erkiteken sie maka situhuna labo lit beda derajat antara dilaki ras diberu. Sipeduaken, hubungan dua kata enda mereken pengerti maka sekalak diberu sinatang tuah e me sekalak diberu si ndatken perkuah ate i bas Dibata nari. I bas perkuah ate Tuhan, maka lit mujisat-mujisat terjadi. I bas perkuah ate Dibata maka hal si la mungkin jadi nyata. I bas bertin sekalak nande me mujisat terjadi. Arah benih si kitik kal, ituahi Dibata janah benih e ibentukna jadi kula manusia. I bas litna kerjasama antara dilaki ras diberu. Jadi arah enda pe siangka maka dilaki ras diberu e mitra, rekan sekerja, bukan hirarki. Sipelueluken, selama 9 bulan bertin nande e me si jadi rumah, si melindungi kula si la megegeh denga e. Diberu e ngasup maba baban si mbelin kal pe, sabap Dibata si ngaturkenca biakta kin bage. Diberu itepa jadi pemelihara kegeluhen. Singkelengi dirina bagepe si lit i sekelewetna. Diberu...mehergalah si akap banta ras temanta si diberu. Bangga kita tubuh selaku diberu, si ergaken anakta bali kelengna ateta sidilaki bagepe si diberu. Sipekena-kena banta, sidukung alu toto ras perbahanen gerakan-gerakan kemajun diberu gelah sipekena-kena kegeluhen bas doni enda.